

GLOGAW DVCATVS.

*Bolkowitz.* Circulus Bolcevicensis, ita dictus ab oppido *Bolkowitz*. Oritur hic amnis *Goltback*, qui districtum Glogawicensem perlabens, in eodem se Oderæ miscet. Non longe hinc in Ducatu Ligniciensi juxta pagum *Sprottichen*, pullulat *Sprotta* fluviolus, qui, postquam circulo & civitati *Sprottaw* nomen dedit, in flumen Bober se præcipitat.

*Beuthen.* Circulus Beuthensis, quem Viadrus medium perlabitur, oppida habet duo, *Carolath* & *Beuthen*. Domini de *Schoniach*, ad quos dominium hoc pertinet, Gymnasium Beuthenii erexere. E regione *Carolath*, fluvius *Weisfurt*, in ditione *Freystätten* ortus, in Oderam influit.

*Freystadt.* Circulus *Freystätten*is, locus admodum conspicuus, aliqua ex parte montibus stipatus, & dominium in circumjacentes tractus exercens, nomen habet à patentibus liberisque campis sive arvis, quibus passim refertus est, quæque in hodiernum etiam diem *liberi campi* ab incolis dicuntur. Antiquitate venerabilis est, etsi ejus primo circa annum Christi 1380 meminerint historia. Inter cæteros annes, qui hic originem habent, & ab Odera absorbentur, præcipuus est *das Schwarzwasser*.

*Grumberga.* Circulus *Grumbergensis*, extremus inferioris Sile-

siæ versus occidentem tractus, ita dicitur ab urbe *Grumberga*, quod videtur à viridibus collibus defluxisse.

Videtur etiam in hac tabula pars fluvii *Hebri*, *Hebrus fl.* quem *Bober* vulgo dicunt, qui in Principatu *Schweinitz* Bohemiæ finibus, juxta oppidum *Landshut* ortus, percurrit Principatum *Iaur*, præteritq; oppida *Hirschberg*, *Lemberg*, *Buntzel*, ad *Sprottaw* usque, ubi fluvio *Sprotta* auctus, & absorpto primum *Quisso* in *Lusatia* orto, *Sagami* versus labitur: inde civitatem *Crossen* petit, & *Neißæ* flumini comes factus *Francofurtum* ad *Oderam* festinat per *Marchiam Brandeburgensem* *Custrinum* versus: porro civitatem *Britzen* transit, atque ex *Marchia Brandeburgensi*, relicta post se *Gartz* & *Griffenhagen*, *Pomeraniam* perlabitur, atque tandem, postquam infra *Stetinum*, lacum *Magnum* effecit, tribus ostiis in mare *Balthicum* præcipitatur.

Anno 1333 *Ioannes*, *Glogoviensis* dux cum *Ioanni Regi Bohemiæ* mediam partem ducatus vendidisset, idem *Ioannes Rex* exercitu in *Glogoviam* veniens, alteram etiam partem in suam redegit potestatem. Posteaque omnes *Silesiæ* *Duces Regi Bohemiæ* se subjecerunt.

